



UJEDINJENE NACIJE

Međunarodni rezidualni mehanizam za krivične sudove

Međunarodni rezidualni mehanizam za krivične sudove (Mehanizam) osnovao je 22. decembra 2010. Savjet bezbjednosti Ujedinjenih nacija da nastavi nadležnost, prava, obaveze i osnovne funkcije Međunarodnog krivičnog suda za Ruandu (MKSR) i Međunarodnog krivičnog suda za bivšu Jugoslaviju (MKSJ), koji su zatvoreni 2015., odnosno 2017. godine.

## SAOPŠTENJE ZA JAVNOST

PREDSJEDNICA

(Isključivo za medije. Nije zvanični dokument)

Haag, 10. juli 2022.

### Sudija Graciela Gatti Santana, predsjednica Međunarodnog rezidualnog mehanizma za krivične sudove Završni govor na konferenciji “Heroine Srebrenice” nedjelja, 10. juli 2022., Potočari

Ekselencije,  
cijenjene žrtve i preživjeli,  
dame i gospodo,

Istinsko mi je zadovoljstvo i čast što mogu biti s vama i prisustvovati ovoj konferenciji čiji je cilj odavanje počasti jedinstvenom iskustvu žena koje su preživjele genocid u Srebrenici. Ovo mi je prva prilika da javno govorim od kada sam preuzela dužnost predsjednice Međunarodnog rezidualnog mehanizma za krivične sudove prije samo deset dana, a i moja prva posjeta vašoj prelijepoj zemlji. Dirnuta sam što vam se mogu obratiti u Potočarima, ovom svečanom mjestu tuge i sjećanja, i upoznati, danas i ovdje, neke od vas izuzetnih žena.

Zaista nema boljeg načina da, kao prva žena na funkciji predsjednika Mehanizma, započnem svoj mandat, nego učestvovanjem u ovom posebnom događaju i slušanjem priča mnogih žena iz raznih životnih perspektiva. Žene koje su preživjele; žene u građanskom društvu; u politici, diplomatiji i pravu; žene sudije. Sve mi zajedno ovdje promišljamo nevjerovatnu hrabrost, postignuća i poteškoće Heroina Srebrenice.

Prošlo je 27 godina od najstrašnijih zločina počinjenih ovdje u Srebrenici, a ipak, ovo je prva ovakva konferencija koja se održava u čast žena, majki, sestara i kćeri koje su bile svjedoci i koje su preživjele događaje iz jula 1995. Ova konferencija pružila nam je važne mogućnosti i ja verujem da ste svaki trenutak iskoristile na najbolji mogući način.

Žene su među onima koji su najteže pogođeni sukobima, a to je naročito tačno u slučaju rata u Bosni i Hercegovini devedesetih godina dvadesetog vijeka. Mnoge od vas su u Srebrenici izgubile svoje najdraže u strašnim okolnostima. Mnoge su takođe bile žrtve užasnih zločina uključujući i seksualno nasilje, zlostavljanje i prisilno premještanje. Dozvolite mi da, kao žena, supruga i majka, izrazim svoje najdublje saučešće zbog nezamislivih gubitaka i boli koje ste pretrpjele.



Uprkos tome što ste se suočile s ličnom i zajedničkom tragedijom, vi – žene koje ste preživjele – već više od 25 godina predvodite neumornu potragu za pravdom i istinom. I vi ste nadahnule druge svojom ustrajnošću. Ja, koja sam tri decenije svoje profesionalne karijere posvetila vladavini prava, odajem najveće poštovanje vašoj odlučnosti. Uistinu, svako ko se nalazi u ovoj prostoriji se na svoj način bori da dâ svoj doprinos, da ostavi trag, da podrži pravdu. Potrebno nam je više takvih osobina u današnjem svijetu, a ovaj događaj je od ključne važnosti u bacanju svjetla na ono što ste vi doživjele i za omogućavanje zajedničkog uvida u to.

Često se kaže da društvo u cjelini ima ogromnu korist kada su žene u društvu ravnopravne. I isto tako, kada žene aktivno učestvuju u procesima nakon sukoba, mir je održiviji. Ova konferencija je stoga došla u pravo vrijeme i ja se nadam da je to pozitivan znak, ne samo za Bosnu i Hercegovinu, već i za druge zajednice i zemlje koje su pogođene sukobima.

Najnovije inicijative iz Ujedinjenih nacija takođe najavljuju postepenu, ali ohrabrujuću promjenu u vidljivosti žena i njihovog doprinosa. Govorim, na primjer, o rezoluciji koju je Generalna skupština usvojila 28. aprila 2021., kojom je 10. mart proglašen Međunarodnim danom žena sudija. Zatim, prije samo nekoliko sedmica, 20. juna 2022., Generalna skupština je usvojila rezoluciju kojom se 24. juni proglašava Međunarodnim danom žena u diplomatiji. U obje ove rezolucije, Generalna skupština je još jednom ustvrdila “da je aktivno učestvovanje žena, pod jednakim uslovima koje imaju muškarci, na svim nivoima donošenja odluka, od suštinske važnosti za postizanje jednakosti, održivog razvoja, mira i demokratije”. Mehanizam je sa zadovoljstvom u 2022. godini obilježio oba ova međunarodna dana po prvi put.

Najzad, željela bih odati priznanje umjetničkoj instalaciji “Majčina marama”. Stvaranjem osjećaja povezanosti među ženama širom svijeta, jednostavna poruka solidarnosti koju prenosi ova instalacija dodirnula je mnoga srca i izuzetno mi je drago što sam i sama dio nje.

Za sam kraj, još jednom izražavam svoje divljenje ženama koje su preživjele genocid u Srebrenici. Vi ste istinske heroine.

Hvala vam na pažnji.

\*\*\*\*

---

Za dodatne informacije, molimo kontaktirajte Službu za odnose s javnošću

Arusha Tel: +255 (0)27 256 5376

Haag Tel: +31 (0)70 512 5691

Email: [mict-press@un.org](mailto:mict-press@un.org)

Pratite nas na [Facebooku](#), [Twitteru](#), [YouTubeu](#), [LinkedInu](#)

[www.irmct.org](http://www.irmct.org)